

子藏

關尹子卷

道家部

2

華東師範大學

「子藏」編纂中心編

總編纂 方勇

副總編纂 吳平

國家圖書館出版社

子藏

道家部

關尹子卷

2

華東師範大學

「子藏」編纂中心編

總編纂 方勇

副總編纂 吳平

國家圖書館出版社

周·尹喜撰 傅增湘批校

關尹子一卷

明刊《十子》本

第二冊目錄

關尹子一卷

周·尹喜撰 傅增湘批校
明刊《十子》本

.....

一

關尹子文始真經一卷

周·尹喜撰 明·吳勉學校
明刊《二十子全書》本

.....

六九

文始真經三卷

周·尹喜撰
明刊本

.....

一四九

關尹子一卷

周·尹喜撰 清·袁芳瑛批校
明刊《六子》本(原書卷末缺葉)

.....

二四七

無上妙道文始真經

周·尹喜撰 沈宗疇批校
清嘉慶七年(1802)嚴可均抄本《子書六種》

.....

三一三

關尹子一卷

佚名撰
清嘉慶十四年(1809)刊《墨海金壺》本

.....

三五九

關尹子一卷

佚名撰
民國間上海中華書局《四部備要》本

.....

四一九

文始真經三卷校勘記一卷

周·尹喜撰 張元濟校勘
民國二十五年(1936)上海商務印書館《四部叢刊三編》影明刊本

四八一

關尹子二卷

周·尹喜撰
抄本

六二一

關尹子

右新書著定關尹子九篇護左都水使者光祿大夫臣劉向言所校中秘書關尹子九篇臣向校讐太常存七篇臣向本九篇臣向輒除錯不可考增闕斷續者九篇成皆殺青可繕寫關尹子名喜號關尹子或曰關令子隱德行人易之嘗請老子著道德經上下篇列禦寇莊周皆稱道家書篇皆寓名有章章首皆關尹子曰四字篇篇叙異章章義異其旨同辭與老列莊異其歸同渾質崖戾汪洋大肆然有式則使人冷冷輕輕不使人狂蓋公授

曹相國參曹相國薨書葬至孝武皇帝時有方士
來以七篇上上以仙處之淮南王安好道聚書有
此不出臣向父德因治淮南王事得之臣向幼好
焉寂士清人能重愛黃老清靜不可闕臣向昧死
上永始二年八月庚子護左都水使者光祿大夫
臣向謹進上

關尹子

一字篇

關尹子曰非有道不可言不可言即道非有道不可思不可思即道天物怒流人事錯錯然若若乎回也憂憂乎闢也勿勿乎似而非也而爭之而介之而喁之而嘖之而去之而要之言之如吹影思之如鏤塵聖智造迷鬼神不識惟不可爲不可致不可測不可分故曰天曰命曰神曰玄合曰道曰無一物非天無一物非命無一物非神無一物非玄物既如此人豈不然人皆可曰天人皆可曰

神人皆可致命通玄不可彼天此非天彼神此非神彼命此非命彼玄此非玄是以善吾道者即一物中知天盡神致命造玄學之徇異名析同實得之契同實忘異名

曰觀道者如觀水以觀沼爲未足則之河之江之海曰水至也殊不知我之津液涎淚皆水

曰道無人聖人不見甲是道乙非道道無我聖人不見已進道已退道以不有道故不無道以不得道故不失道

曰不知道妄意卜者如射覆孟高之存金存玉中

之存角存羽卑之存瓦存石是乎非是乎惟置物者知之

曰一陶能作萬器終無有一器能作陶者能害陶者一道能作萬物終無有一物能作道者能害道者

曰道茫茫而無知乎心儻儻而無羈乎物迭迭而無非乎電之逸乎沙之飛乎聖人以知心一物一道一三者又合爲一不以一格不一不以不一害一
曰以盆爲沼以石爲島魚環游之不知其幾千萬

望而不窮也夫何故水無源無歸聖人之道本無首末無尾所以應物不窮

曰無愛道愛者水也無觀道觀者火也無逐道逐者木也無言道言者金也無思道思者土也惟聖人不離本情而登大道心既未萌道亦假之

曰重雲蔽天江湖黯然游魚茫然忽望波明食動幸賜于天即而就之漁釣斃焉不知我無我而逐道者亦然

曰方術之在天下多矣或尚晦或尚明或尚強或尚弱執之皆事不執之皆道

曰道終不可得彼可得者名德不名道道終不可行彼可行者名行不名道聖人以可得可行者所以善吾生以不可得不可行者所以善吾死

曰聞道之後有所爲有所執者所以之人無所爲無所執者所以之天爲者必敗執者必失故聞道於朝可死於夕

曰一情冥爲聖人一情善爲賢人一情惡爲小人一情冥者自有之無不可得而示一情善惡者自無起有不可得而秘一情善惡爲有知惟動物有之一情冥者爲無知溥天之下道無不在

曰勿以聖人力行不急則曰道以勤成勿以聖人
堅守不易則曰道以執得聖人力行猶之發矢因
彼而行我不自行聖人堅守猶之握矢因彼而守
我不自守

曰若以言行學識求道互相展轉無有得時知言
如泉鳴知行如禽飛知學如擷影知識如計夢一
息不存道將來契

曰以事建物則難以道弃物則易天下之物無不
成之難而壞之易

曰一灼之火能燒萬物物亡而火何存一息之道

能冥萬物亡而道何在

曰人生在世有生一日死者有生十年死者有生百年死者一日死者如一息得道十年百年死者如歷久得道彼未死者雖動作昭智止名爲生不名爲死彼未契道者雖動作昭智止名爲事不名爲道

曰不知吾道無言無行而即有言有行者求道忽遇異物橫執爲道殊不知舍源求流無時得源捨本就末無時得本

曰習射習御習琴習奕終無一事可以一息得者

惟道無形無方故可得之於一息

曰兩人射相遇則巧拙見兩人奕相遇則勝負見
兩人道相遇則無可示無可示者無巧無拙無勝
無負

曰吾道如海有億萬金投之不見有億萬石投之
不見有億萬汗穢投之不見能運小鰕小魚能運
大鯢大鯨合衆水而受之不爲有餘散衆水而分
之不爲不足

曰吾道如處暗夫處明者不見暗中一物而處暗
者能見明中區事

曰小人之權歸於惡君子之權歸於善聖人之權歸於無所得惟無所得所以爲道

曰吾道如劍以刃割物即利以手握刃即傷

曰邊不問豆豆不答邊瓦不問石石不答瓦道亦不失問歟答歟一氣往來道何在

曰仰道者跂如道者駸皆知道之事不知道之道是以聖人不望道而歉不恃道而豐不借道于聖不賈道于愚

二柱篇

關尹子曰若椀若盂若瓶若壺若甕若盎皆能建

天地兆龜數著破瓦文石皆能告吉凶是知天地
萬物成理一物包焉物物皆包之各不相借以我
之精合彼之精兩精相搏而神應之一雌一雄卵
生一牡一牝胎生形者彼之精理者彼之神愛者
我之精觀者我之神愛爲水觀爲火愛執而觀因
之爲木觀存而愛攝之爲金先想乎一元之氣具
乎一物執愛之以合彼之形冥觀之以合彼之理
則象存焉一運之象周乎太空自中而升爲天自
中而降爲地無有升而不降無有降而不升升者
爲火降者爲水欲升而不能升者爲木欲降而不